



Siverth K. Heilmann
Atassut

UKA 2021/109
3. november 2021

Nersussuit puulukillu nujuitsut neqaannik ilivitsunik aamma affarnik nioqqutissat 1999-imi eqqussuinermi akitsuutaarutsinneqarnerisa sunniutaannik nalilersuinermik Naalackersuisut UKA 2022-imi saqqummiussinissaat pillugu Inatsisartuni aalajangiiffigisassatut saqqummiussinissaat pillugu Inatsisartuni aalajangiiffigisassatut siunnersuut. Nalilersuinermi ilaatigut akitsuutaarutsitsinermi ataatsimut piffinnilu suliffissaqartitsinikkut sunniutit kiisalu neqinik igaannariangorlugit sulianik eqqussuisarnermut sunniutit ilanngunneqassapput. Taamaattaaq nalilersuinermi nunatsinni neqinik tunisassianik suliarinnittarneq annertunerulersinniarlugu eqqussuinermik killiliissutaasinnaasut qulaajarnissaat ilaatinneqassaaq.

(Inatsisartunut Ilaasortaq Mariane Paviasen, Inuit Ataqtigiit)

Inatsisartuni ilaasortaq Mariane Paviasen, Inuit Ataqtigiit Inatsisartunut aalajangiiffigisassamik siunnersuuteqarninnut qujanaq, imatullu Atassummiit oqaaseqarfigissavarput.

Siunnersuuteqartoq ilumoorpoq, nunatta iluani naalackersuinikkut anguniagaasoq immitsinnut pilersornerulernissarput, tamannalumi maani inimi aamma imaani nunamilu uumassusilit eqqarsaatigalugit nammineq avammullu tunisassiornerunissarput anguniarneqartariaqartoq. Taamatut siunertaqarneq tunngaviatigut partiinit tapersorneqartaraluaqaluni, inuussutissalerinnermut oqartussaaffiup Qallunaat Nunaanniit, Nunatsinnut suli angerlaanneqannginnera ilaatigut aporfiunera ilisimaneqarpoq.

Nersussuit puulukiuppataluunniit avataaniit eqqussorneqartut pillugit, nunatsinni oqaasinnaarineqarpoq, “taamak allatuutigalugit mamartigisut aamma akikitsuatsiaammata pisiarisarpagut”. Taamak oqariartaaseqarneq akissaatikitsunik taaneqartartut kisimik atugarinngilaat. Ukiunili makkunani aamma avataaniik nioqqutissanik eqqussukkat niuvertarfinni qanoq akitsoriartuinnartigineri, ilaa kiammita arajutsisimavaa.

Nammineq umimmannik tuttunillu piniartut pisaannik tunisassiornerulernissamik siunertaqarluta aqqustissusseqataasimavugut. Kangerlussup qinnguani, Maniitsoq Sisimiullu kattunnissaq sioqqullugu neqileriffimmik aningaasaleeqatigiinnitsigut pilersitsisimavugut, piniartut aningaasarsiornerannut soorunalumi pisisartut neqissaqarniarnerannut iluaqutaaqisumik. Matumani uumasut nakorsaat avaqqunneqarsinnaanngimmat, Neqi A/S Narsaq tunisassiortoqarnerani suleqatigilluarneqarpoq.

Umimmannik tuttunillu avammut tunisassiorsinnaanermik takorluuisarneq, piniakkanik killilersukkanik pisassiisarneq taamak annikitsigitillugu imminermik angujuminaareeqaaq.

Ilaquttatsinnut qallunaat nunaannuinnarluunniit katsorsartittunut nassiussiniarutta, qanoq annikitsigisumik periarfissaqartitsisoqartoq nalunngilarput. Taamatulli aporfeqartuarneq Atassummiit uniffigiinnarusunnatigu, aningaasarsiornitta avammullu sulitunissatsinnut aporfiit ikilisarussullugit, partiit aammaarluta suleqatiseraagut.

Atassummiit kujataani savaateqarnerup saniatigut, nersussuit puulukillu qujanaqisumik tunisassiarineqartarneri annertusiartuinnartut, politikkikkut aqutissiuussinissatsinnik, inatsisartuni Naalackersuisut peqquneqarnissaannik siunnersuuteqarnera Atassummiit tamakkiisumik tapersiinerput oqaatigeriissavarput.

Taamatut oqaaseqarluta Naalackersuisut allannguutissatut siunnersuuteqarnerat ilanngullugu, ataatsimiititaliami susassaqtumi suliaq peqqissaarullugu nalilersorneqaqqaarnissaa Atassummiit inassutigaarput.

Qujanaq.